

Evening Dogri News Bulletin, 19 May 2024

इवनिंग डोगरी न्यूज़ बुलेटिन

समे-18:15 Hrs

Headlines

- 1 कल होने आले लोकसभा चुनावें दे 5में गेड़ दे मतदान लेई सब्बै तैयारियां मकम्मल। जम्मू-कश्मीर दी बारामुला सीट समेत कुल 49 लोकसभा सीटें लेई 8 करोड़ 95 लख कोला मते मतदाता वोट पाने दे अधिकार दा इस्तेमाल करडन।
- 2 बारामुला लोकसभा सीट लेई कुल 22 मेदवार चुनां मैदान च न जिंदे सियासी भविक्ख दा फैसला कोई 47 लख मतदाताएं दे हत्थें च ऐ।
- 3 उपराज्यपाल मनोज सिन्हा होरें कल कश्मीर घाटी च होए दे दऊं आतंकी हमलें दी निंदेआ करदे होई आखेआ ऐ जे कसूरवारें गी उंदे अंजाम तोड़ी पजाई दिता जाग।
- 4 समूलचे जम्मू संभाग च गर्मी कोला राहत दे कोई असार नेई न। मौसम विभाग नै 27 मई तोड़ी मौसम दे खुशक बने रौहने दी पेशनगोई कीती ऐ।

<><><><><><>

5th Phase Arrangements

चला'रदे लोकसभा चुनावें दे कल पंजमें गेड़ दे मतदान ताई सब्बै तैयारियां मकम्मल करी लैती गेइयां न। इस मरहले च 6एं राज्यें ते दऊं केंद्र शासित प्रदेशें दिएं 49 लोकसभा सीटें पर मतदान होगा। इंदे च उत्तर प्रदेश दियां 14, महाराष्ट्र दियां 13, पच्छिम बंगाल दियां 7, ओडिशा ते बिहार दियां 5-5, झारखंड दियां 3 ते जम्मू-कश्मीर सने लद्दाख दी 1-1 सीट शामिल ऐं 7एं मरहलें दे चुनावें च इस गेड़ च सब्बनें शा घट्ट 49 सीटें लेई वोट पाए जाडन। एहदे लेई चुनां प्रचार कल्लै दा खत्म होई गेदा ऐ। सियासी लीडर अपनी-अपनी पार्टियों दे मेदवारें ताई समर्थन जुटाने आस्तै बहू शा बहू हल्कें गी कवर करने दा पूरा जत्त ला करनदे न।

<><><><><><>

Baramula-PC

लोकसभा चुनावें दे 5में गेड़ तैहत जम्मू-कश्मीर दी बारामूला-कुपवाड़ा संसदीय सीट ते लद्दाख दी इक्कली सीट लेई बी कल वोट पाए जाडन। बारामूला संसदीय हल्के च खडेरे गेदे 2103 मतदान केंद्रें रायं तकरीबन 17 लख मतदाता 22 मेदवारें दे सियासी भागें दा फैसला करडन। इस हल्के च 4 जिले बारामूला, कुपवाड़ा, बांदीपोरा ते बडगाम दा किश हिस्सा शामिल ऐ। मतदान बड्डलै 7 बजे थमां संझा 6 बजे तगर चलोग। नेशनल कांफ्रेंस दे उपाध्यक्ष उमर अब्दुल्ला, जम्मू-कश्मीर पीपल्स कांफ्रेंस अध्यक्ष सज्जाद गनी लोन हुंदे कन्नै-कन्नै अजाद मेदवार साबका विधायक इंजीनियर रशीद जेडे इस्सलै तिहाड़ जेल च बंद न, इस निर्वाचन हल्के थमां मुख मेदवार न। कुपवाड़ा ते बारामुला जिले दे 28 सरहदी मतदान केंद्रें सने बारामुला दे 2103 मतदान केंद्रें परा लाइव वैब कास्टिंग दी बवस्था कीती गेदी ऐ। कश्मीर संभाग दे प्रवासी वोटरें ताई 26 टकोहदे मतदान केंद्र वी खडेरे गेदे न। इनें केंद्रें च जम्मू दे 21 दिल्ली दे 4 ते उधमपुर च स्थापित कीते गेदा 1 मतदान केंद्र शामिल ऐ। लद्दाख च भाजपा दे ताशी गैसन, कांग्रेस पार्टी दे तेसरिंग नामग्याल ते कारगिल लेई आजाद मेदवार मोहम्मद हनीफ बश्कार त्रिकोणी मुकाबला होने दी मेद ऐ। वोटरें दी गिनतरी 4 जून गी इक्को बार करोआई जाग।

<><><><><><>

J&K-Voting

जम्मू-कश्मीर च चुनावी प्रक्रिया च हिस्सेदारी गी यकीनी बनाने दे मकसद कन्नै सरहदी जिले पुंछ च जिला चुनां अधिकारी होरें समूलचे जिले थमां 1100 मतदाताएं गितै घरै थमां गै वोट पोआना रम्भ करी दिता ऐ। इस कम्मै आस्तै जिले च 105 टीमें गी नियुक्त कीते गेदा ऐ जिनें गी उनें वोटरें तोड़ी पुज्जने दा कम्म सौंपे दा ऐ जिनें लोकें घरै थमां गै वोट पाने दा विकल्प चुने दा ऐ। ध्यानजोग ऐ जे पुंछ जिले घरै थमां वोट पाने आहला विकल्प समूलचे जम्मू-कश्मीर थमां सब्बनें शा बहू वोटरें चुने दा ऐ। घरै थमां मतदान लागू करने दा फैसला दिव्यांग, बुजुर्ग वोटरें गी सहूलत पुजाने दे मकसद कन्नै लैता गेदा ऐ तां जे ओहू वी लोकतांत्रिक प्रक्रिया च अग्रे आइयै शामिल होन।

<><><><><><>

Terror-Attack

25 मई गी अनंतनाग-राजौरी लोकसभा सीट लेई होने आले मतदान कोला पैहले आतंकवादिएं जंदी रातीं दऊं बक्ख-बक्ख वारदातें गी इंजाम दिंदे होई इक साबका सरपंच दी गोली मारिये हत्या करी दित्ती ते इक सैलानी जोड़े गी घायल करी दित्ता। जानकारी मूजब षोपियां जिले दे हीरपोरा इलाके च किश बे-पंछानू आतंकवादिएं साबका सरपंच एजाज अहमद गी भलेया कोला आइयै गोली मारी जेहदी अस्पताले च जखमें दी ताव नेई जरने कारण मौत होई गई। सुरक्षाबलें इलाकें गी घेरियै तुपाई आली कारवाई शुरू करी दित्ती ऐ। तोआई अनंतनाग दे यन्नार इलाके च आतंकवादिएं इक सैलानी जोड़े पर हमला कीता जिंदी पंछान राजस्थान दे जयपुर शैहर दे बसनीक तबरेज ते ओहदी घरै आली फरहा दे तौरा पर कीती गई ऐ। कश्मीर घाटी दिएं दऊं लोकसभा सीटें बारामुला ते अनंतनाग सीटें लेई बिलतरतीब 20 ते 25 मई गी वोट पोआए जाने ना। तोआई उपराज्यपाल मनोज सिन्हा होरें इनें दौनें हमलें दी सख्त निंदेया करदे होई आखेआ जे सरपंच एजाज अहमद शेख हुंदी हत्या गी इक बड्डा सदमा ते मंदे भागें आहली घटना करार दिंदे होई आखेआ जे दुखै दी इस घड़ी च अस्स सब्बै उंदे परिवार दे कन्ने हां। उनें प्रशासन गी निर्देश दित्ता जे ओहू घायल सैलानिं दे इलाज च कोई कसर बाकी नेई छोड़ी जा। जारी इक बयान च एल.जी होरें आखेआ जे सरकार नै जम्मू-कश्मीर ते उंदे समर्थकें खलाफ कार्रवाई करने दी खुल्ली छूट दित्ती दी ऐ। उनें गलाया जे उनेंगी अपने सुरक्षा कर्मिं दी हिम्मत ते काबलियत पर पूरा भरोसा ऐ ते इनें हमलें दे दोषिं गी तौले फगडिं उंदे अंजाम तगर पुजाई दित्ता जाग। सुरक्षाबलें हमलावरें गी तुप्पने लेई कार्रवाई शुरू करी दित्ती दी ऐ। केई सियासी पार्टिं जिंदे च नेशनल कांफ्रेंस, बीजेपी, पीडीपी वगैरा ने इनें वारदातें दी सख्त निंदेया कीती ऐ।

<><><><><><>

Traffic

जम्मू-श्रीनगर राश्ट्री जरनैली शिडक एन.एच-44 पर 21 मई मंगलवारें गी गड्डियें दी आओजाई बंद रौहग। जम्मू-कश्मीर ट्रेफिक पुलस नै इक्क सोशल मीडिया पोस्ट च दस्सेया जे खराब होई सकने आहला ताजा समेयान, मुर्गे-भिडुं आहिलयां गड्डियें ते सुरक्षाबलें दिरें गड्डियें सने कुसै चाल्ली दी बी गड्डी गी जरनैली शिडक पर आओजाई दी खुल्ल नेई दित्ती जाग। इसै चाल्ली जम्मू थमां रामबन, गूल, बनिहाल, श्रीनगर आस्तै दपक्खिया गड्डियां बंद रौहंगन। इस जरनैली शिडक पर यात्रा करने आहलें गी सलाह दितती जंदी ऐ जे ओहू इस गल्ला गी ध्यानै च रक्खियै अपनी यात्रा रम्भ करन जे 21 मई मंगलवार गी एन.एच-44 जम्मू-श्रीनगर राश्ट्री जरनैली शिडक गड्डियें दी आओजाई लेई बंद रौहग।

<><><><><><>

S.Heat in Jammu

जम्मू संभाग च अज्ज बी सख्त गर्मी थमां लोकें गी दना क बी राहत नेई थ्होई। जम्मू च अज्ज इस मौसम दा सब्बनें शा बद् तापमान 41.6 डिग्री सेल्सियस दर्ज कीता गेआ। मौसम विभाग नै संभाग च 27 मई तगर मौसम च कुसै टकोह्दे बदलाव दी पेशनगोई नेई कीती ऐ। ध्यानजोग ऐ जे पिछले किश दिनें थमां जम्मू च तापमान लगातार बदा रदा ऐ। मैहकमे नै दस्सेया ऐ जे 20 थमां 27 मई तगर खित्ते च मौसम खुशक बने दा रौहग। जम्मू इक्क हफ्ते थमां लूहू दी चपेट च ऐ ते शैहरै दा तापमान लगातार बदा रदा ऐ। 16 मई गी इस सीजन दौरान तापमान पैहली बारी 40 डिग्री उप्पर पुज्जेया हा ते औदे मगरा एहू लगातार बदा जा रदा ऐ। तोआई उत्तर पच्छिम भारत दे बड्डे हिस्से च जबरदस्त गर्मी अगले 5 दिनें तगर जारी रौहग जेदा सब्बनें शा मता असर दिल्ली, हरियाणा, पंजाब, राजस्थान ते उत्तर प्रदेश पर पौने दी संभावना ऐ। भारत मौसम विभाग नै अगले 5 दिनें दौरान उत्तर पच्छिम भारत दे मैदानी इलाकें च सख्त गर्मी ते अगले 3 दिनें दौरान पूर्वी ते मध्य इलाकें च गर्मी दी लैहर चलने दी पेशनगोई कीती ऐ।

<><><><><><>

DC-Samba SANJAY

सांबा दे जिला विकास कमीशनर अभिशेक शर्मा होरें श्री अमरनाथ जी दी यात्रा दी पछौकडे च सरबंधत सब्बने मैहकमे गी आखेआ ऐ जे ओ यात्रा लेई तैआरिं गी बेहतर ढंगै सिर तोड चाढना जकीनी बनाने लेई पैहले थमां आपूं च नेडमा तालमेल बनाइयै कम्म करन। यात्रा तैआरिं बारे सद्दी गेदी इक बैठक दी अध्यक्षता करदे होई डीसी होरें आखेआ जे सांबा जिले दिएं हदें अंदर पौंदे, यात्रिं दे ठैहने लेई सब्बने 26 केन्द्रें च लोडचदे सब्बे इंतजाम पैहले थमां करी रखे जान। मीटिंगा च जानकारी दित्ती गई जे चिची माता ते नोनाथ आश्रम च आरएफआईडी कार्ड जारी करने आले 2 विशेश केन्द्र बनाए जांगन। एहदे इलावा

राष्ट्रीय जरनैली शिडक प्राधिकरण एनएचएआई दे अधिकारिणं गी निर्माण कम्मं ते साईन बोर्ड लाने दे कम्मं च तेजी आनने लेई आखेआ।

<><><><><><>

Swankha

बाबा सिद्ध गोरिया नाथ जी स्वांखा च 7 दिनें तगर चलने आहले सलाना मेले दिये तैयारिये गी खीरी शक्ल देई दिती गेई ऐ। मंदर ते आले-दोआले दिये ईमारते दी सफाई-सुथराई ते सफेदी दा कम्म तकरीबन मुकम्मल होई गेदा ऐ। इस सरबंधे च होर मती जानकारी कन्नै साम्बा थमां स्हाढे जिला संवाददाता सतपाल शर्मा।

<><><><><><>

DC-Jammu

जम्मू दे जिला विकास कमिशनर सचिन कुमार वेश्य होरे मैहकमा माल दे कम्मं कारकरदगिणं दा जायजा लैने लेई अज्ज इक्क बैठक दी अध्यक्षता कीती। उनें जोर देइए आखेआ जे सार्वजनिक सेवाएं गी लोके तगर पुजाने लेई बनाए गेदे नियमे ते दिश-निर्देशे दी सख्ती नै पालमा कीती जा। उनें लोक सेवा गरंटी कनून दी पूरी चाल्ली अमलावरी दा ख्याल रखने पर जोर दित्ता।

<><><><><><>

Black-Topping-Reasi

लोक निर्माण विभाग पीडब्ल्यूडी पिच्छले किश म्हीने दौरान राष्ट्रीय जरनैली शिडके गी पुजे दे नुकसान गी पूरने ताई उंदी मरम्मत ते परतिये नमे रियेया उन्दे निर्माण कम्मं च युद्ध स्तरै पर जुटे दा ऐ। रियासी दे डीसी विशेष महाजन होरे आखेआ जे होई दिणं बरखे ते थाहरे-थाहरे पानी दे खडा होने करिये राष्ट्रीय जरनैली शिडक एन.एच-144 बुरी चाल्ली प्रभावित होए दा हा। मैहकमा पीडब्ल्यूडी नै इसी मोटर गडिये लेई सुचारू करने ताई अपने संसाधन जटाए ते इसलै एहदा संदोखजनक ढंगै कन्नै कम्म जारी ऐ। स्हाढे संवाददाता कन्नै गल्ल करदे होई रियास दे डीसी विशेष महाजन होरे आखेआ।

<><><><><><>

Health-Deptt. Doda

डोडा जिले च बखार जनेय मामले दिये रिपोर्टे पर तुरत कारवाई करदे होई जिले दे मुख मेडिकल अफसर डॉक्टर ओम कुमार दे निर्देशे तैहत सेहत मैहकमे नै डोडा दे इक्क निजी स्कूल च जागरूकता कार्यक्रम दा सरिस्ता कीता। कार्यक्रम च खसरा, रूबेला ते फ्लू जनेइये बमारियां बखार बगैरा बारै जागरूक कीता गेआ। एहदा मकसद इंफेक्शन गी रोकने दे कन्नोकन्नी बेहतर सेहत गी बढ़ावा देने ताई खान-पान, सफाई-सुथराई ते सेहतमंद जीन दे महत्व बारै विद्यार्थिये ते अमले गी जानकार बनाना हा। इस मौके डॉक्टर वर्षा शर्मा होरे हत्थे दी सफाई पर जोर भरेया ते सेई ढंगै कन्नै हत्थे गी धोने दे तरीके गी दस्सेया।

<><><><><><>